

四庫全書

子部

欽定四庫全書

古今事文類聚後集卷四十二

宋 祝穆 撰

羽蟲部

鵬

鵠鵠鵠
並附

羣書要語朋及鵬皆古文鳳字也朋鳥象形鳳飛羣鳥
從以萬數故以鵬為朋黨字

說文

郭象云鵬鵬之實吾所

未詳

莊子注

詩句風翮九霄鵬

鵬路觀翺翔

從茲振

羽翰 九萬一朝搏

並杜

鵠寧與黃鵠比翼乎將與雞鶩爭食乎

楚辭

燕雀安知鴻

鵠之志哉

陳勝傳

鵠邈清風凌顥氣翱翔於冥冥之間

李華

記

詩句南山有喬木黃鵠據其巔

韓

黃鵠摩蒼天

杜

黃鵠

垂兩翅

杜

矯翮逐黃鵠

鵠鷗東隅山有鳥名鵠鷗

山海經

古今事實

鵬徙南溟

北溟有魚其名為鯢鯢之大不知其幾千里也化而為
鳥其名為鵬鵬之背不知其幾千里也怒而飛其翼若
垂天之雲是鳥也海運則將徙於南溟南溟者天池也
齊諧者志怪者也諧之言曰鵬之徙於南溟也水擊三千
里搏扶搖而上者九萬里去以六月息者也一去半歲至天池而
息又曰風之積也不厚則其負大翼也無力故九萬里
則風斯在下矣而後乃今培風背負青天而莫之夭闕

者而後乃今將圖南蜩與鷺鳩笑之曰我決起而飛捨
榆枋時則不至而控於地而已矣奚以之九萬里而南
為又曰窮髮之北有溟海者天池也有魚焉其廣數千
里未有知其修者其名為鵬有鳥焉其名為鵬背若泰
山翼若垂天之雲搏扶搖而上者九萬里絕雲氣負青
天然後圖南且適南溟也斥鴳笑之曰彼且奚適也我
騰躍而上不過數仞而下翱翔蓬蒿之間此亦飛之至
也而彼且奚適也此小大之辨也

莊子逍遙

鵠下太液

以下
係鵠

漢始元元年黃鵠下建章宮太液池中公卿上壽

彈雲中鵠

宋桓榮祖善彈為東海太守登西樓見翔鵠雲中謂左
右曰當生取之於是彈其兩翅毛脫盡墜地無傷養毛
生乃去

鷹搏鵬鵠

見鷹
門

鵠嚇鵠鵠

係鵠
鵠

惠子相梁莊子往見之惠子恐代其相搜國中三日三
夜莊子伏主人馬棧下往見之曰南方有鳥名鵯鵯南
海而飛之北海非梧桐不栖非竹實不食非醴泉不飲
於是鵯得腐鼠鵯鵯過仰而視之曰嚇子欲以梁國嚇
我耶莊子

古今文集

雜著

大鵬賦並序

李白

余昔於江陵見天台司馬子微謂余有仙風道骨可與
神遊八極之表因著大鵬遇希有鳥賦以自廣此賦已
傳於世往往人間見之悔其少作未窮宏遠之旨中年
棄之及讀晉書觀阮宣子大鵬讚鄙心陋之遂更記憶
多將舊本不同今腹存乎集豈敢傳諸作者庶可示諸
子弟而已其辭曰

南華老仙發天機於漆園吐崢嶸之高論開浩蕩之奇
言徵至怪於齊諧談北溟之有魚吾不知其幾千里其

名曰鯢化成大鵬質疑胚渾脫髻鬣於海島張羽毛於
天門制渤澥之春流晞扶桑之朝暾烜赫乎宇宙憑陵
乎崑崙一鼓一舞烟濛沙昏五嶽為之震薄百川為之
崩奔爾乃蹶厚地揭太清亘層雷突重溟激三千以崛
起向九萬而迅征背紫太山之崔嵬翼舉長雲之縱橫
左向右旋倏陰忽明歷汗漫以天矯玃閭闔之崢嶸簸
鴻濛扇雷霆斗轉而天動山搖而海傾怒無所搏雄無
所爭固可想像其勢彷彿其形若乃足縈虹蜺目耀日

月連軒脊拖揮霍翕忽噴氣則六合生雲灑毛則千里
飛雪邈彼北荒將窮南圖運逸翰以旁擊鼓奔飈而長
驅燭龍銜光以照影列缺施鞭而啓途塊視三山杯看
五湖其動也神應其行也道俱任公見之而罷釣有窮
不敢以彎弧莫不投竿失鏃仰之長吁爾其雄姿壯觀
映背河漢上摩蒼蒼下覆漫漫盤古開天而直視羲和
倚日以旁歎繽紛乎八荒之間掩映乎四海之半當胸
臆之掩晝若混茫之未判忽騰覆以迴轉則霞廓而霧

散然後六月一息至于海湄歛翳景以播摺逆高天而
下垂憇乎泱泱之野入乎汪漭之池猛勢所射餘風所
吹溟漲沸渭岩巒紛披天吳為之怏慄海若為之躩跼
巨鼇冠山而卻走長鯨騰海而下馳縮殼挫鬣莫之敢
窺吾亦不測其神怪而若此盖乃造化之所為豈比夫
蓬萊之黃鵠誇金衣與菊裳恥蒼梧之玄鳳耀綵質與
錦章既服御於靈仙久馴擾於池隍精衛殷勤于銜木
鷄鷄悲愁乎薦觴天雞警曉於蟠桃跋烏晰耀于太陽

不曠蕩而縱適何拘攣而守常未若茲鵬之逍遙無厭
類乎比方不矜大而畧猛每順時而行藏參玄根以比
壽飲元氣以充腸戲暘谷而徘徊憑炎洲而抑揚俄而
希有鳥見謂之曰偉哉鵬乎此之樂也吾右翼掩乎西
極左翼蔽乎東荒跨躡地絡周旋天網以恍惚為巢以
虛無為場我呼爾遊爾呼我翔於是乎大鵬許之欣然
相隨此二禽者已登於寥廓而斥鷃之輩空見笑於藩
籬

古詩係鵠

黃鵠歌

漢武帝

黃鵠飛兮下建章羽肅肅兮行蹌蹌金為衣兮菊為裳
自顧薄德兮愧爾嘉祥

鳳驚驚神
雀並附

羣書要語羽蟲三百六十而鳳凰為之長大戴禮鳳凰者

仁鳥也雄曰鳳雌曰凰瑞應圖一名瑞鷗小者曰鷖鷖說文

威鳳有威儀也六帖丹穴之山有鳥狀如鶴五色而文名

曰九苞鳳見則天下安寧

山海經

麟鳳龜龍謂之四靈

禮運

鳳凰于飛和鳴鏘鏘

左傳

鳳凰于飛翾翾其羽亦集爰止

藹藹王多吉士

卷阿

鳳凰鳴矣于彼高岡梧桐生矣于彼

朝陽注鳳凰之性非梧桐不棲非竹實不食

同上

不啄生

蟲不履生草不羣居不侶行行不經羅墜網明治亂見

存亡也

六帖

或問君子在治曰若鳳治則見亂則隱

揚子

枳

棘非鸞鳳所棲

仇覽傳

鳳翔于千仞兮覽德輝而下之見

細德之險微兮遙曾擊而去之

賈誼賦

鸞鳳沖霄必假羽

翼

太宗飛白

南方之鳥天為生食其樹名瓊枝以琅玕為實

子鳬鴈皆啖夫梁藻兮鳳逾翔而高舉衆鳥皆有所登

棲兮鳳獨皇皇而無所集

楚辭

詩句朝餐琅玕石夕飲玉池津

江文通

靈鳳託高梧凌

風何翩翩

李白

鸞鸞鳳屬神鳥也

說文

神雀出崑丘

漢武內傳

古今事實

巢阿閣

黃帝服齊于中宮坐于玄扈洛上乃有大鳥體備五色

或止東園或巢阿閣

世紀

鳳凰至

黃帝即位施恩修德宇內和平未見鳳凰乃召天老而問之曰鳳象何如天老對曰夫鳳象鴻前而麟後蛇頭而魚尾龍文而龜背燕頤而雞喙首戴德頸揭義背負仁心入信翼挾禮足履文尾繫武小音金大音鼓延頸

奮翼五色備舉住即安來則喜游必擇所饑不妄下黃
帝曰於戲允哉朕何敢與焉於是黃帝乃服黃衣帶黃
紳戴黃冠齋于中宮鳳乃蔽日而至止帝東園集梧樹
食竹實沒身不去

韓詩
外傳

聽鳳為律

見竹
門

以鳥紀官

少昊氏立鳳鳥適至故以鳥紀官

昭十
七

鳳止于庭

堯即政七十年鳳凰止庭

尚書中候

鳳凰蹠蹠匪堯之庭

揚子

鳳凰來儀

舜簫韶九成鳳凰來儀

鳳舞于庭

周成王時天下大治鳳凰來舞于庭成王乃援琴而歌

蔡邕
琴操

夫子嘆鳳

子曰鳳鳥不至河不出圖吾已矣夫

鳳在郊藪

見麟門

卷四十二

楚狂歌鳳

楚狂接輿歌而過孔子曰鳳兮鳳兮何德之衰往者不可諫來者猶可追已而已而今之從政者殆而

指山雞為鳳

尹文子楚人握山雞路人問何鳥欺之曰鳳凰也路人曰我聞鳳凰今始見矣汝販之乎請賈千金弗與加倍乃與之方欲獻之楚王經宿死路人不遑惜其千金惟

恨不得獻王聞之感其欲獻已召厚賜之過買鳥之金
十倍

漢鳳呈瑞

昭帝始元三年鳳凰集東海遣使祠其處宣帝本始元
年鳳凰集膠東十四年鳳凰集北海地節二年鳳凰集
魯羣鳥從之帝行幸河東之明年春鳳凰集殺祠所集
處得寶玉乃下詔赦天下又鳳凰集上林乃作鳳凰賦
以答嘉瑞神爵四年鳳凰十一集杜陵又以鳳凰五至

改元五鳳五鳳三年鸞鳳又集長樂宮東園上飛下至
地文章五色留十餘刻吏民並觀之光武建武八年鳳
高八尺毛羽五色集潁川郡羣鳥並從蓋地數頃留十
七日乃去章帝時鳳凰三十九見

吹簫致鳳

見神
仙門

鳳集境內

黃霸為潁川太守仁化流行鳳集境內

夢吐白鳳

見夢
門

朝陽鳳鳴

胡瓊與褚遂良相繼死內外以言為諱將二十年帝造奉天宮御史李善感始上疏極言時人喜之謂為鳳鳴

朝陽

瓊傳又褚陶傳謂碩彥先鳳鳴朝陽

爭先覩鳳

見慕名門

驚驚鳴岐

以下係驚驚

周之興也驚驚鳴于岐山

周語

夢驚占祥

見夢門

神雀之瑞

以下係
神雀

宣帝元康二年春神雀數集泰山夏詔曰今春五色雀
以萬數過屬縣翱翔而舞四年三月詔曰神爵五采以
萬數集長樂未央改元神爵

以鵩雀為神雀

京兆尹張敞舍鵩雀飛集丞相府黃霸以神雀議欲以
聞

古今文集

雜著

詰鳳

陳黯

嘗聞揚雄云君子在治若鳳在亂若鳳謂隱見之得宜也。將欲仰之以為鑒，迨覽其劇，秦美新則有異乎？是雄仕漢，遇新室之亂，既不能去之，又懼禍及，乃為斯文以媚而取容。嗚呼！鳳固若是耶？果若是，則鳳遇矰繳而徊翔，無聞耶？君子之仕也，所以行道。道之不行也，則可以明其節。彼莽之不臣雄，時在列，宜以君子之義興亡之。

理匡救之以行其道苟畏其威愛其死則可拔簪高謝以明其節詎有苟祿貪生徇非飾詐廣引秦過以喻惡則是稔其篡逆也與古之持顛危死節者背而馳也嚮者所著鳳之說得不為誣鳳也哉雞常禽也曉晦而不迷其候鳳靈鳥也理亂而不知其時耶噫言之不思有如是耶昔仲尼仕魯以季桓子荒齊樂知其不可匡也乃去之魯不聞矯為其辭以求庸於魯雖仲尼日月其德人之不佞也揚雄亦慕仲尼之教者以著書立言為

事得自易哉夫立言者豈不欲人之從教耶且已不能
信人況求信於人乎語曰君子先行其言而後從之斯
言可欺也哉

古詩

岐山下

韓愈

丹鳳五色羽其名為鳳凰昔周有盛德此鳥鳴高岡和
聲隨翔風窈窕相飄揚

古風

李白

鳳饑不啄粟所食唯琅玕焉能與羣雞刺促爭一餐朝
鳴崑丘柱夕飲砥柱湍歸飛海路遠獨宿天霜寒幸過
王子晉結交青雲端懷恩未得報感別空長歎

朱鳳行

杜甫

君不見見瀟湘之山衡山高山巔朱鳳聲嗷嗷側身長顧
求其曹翹垂口噤心甚勞下愍百鳥在羅網黃雀最小
猶難逃願分竹實及螻蟻盡使鷗梟相怒號

古詩

係五
色雀

五色雀並序

蘓子瞻

海南有五色雀常以兩絳者為長進止必隨焉俗謂之鳳凰云久旱而輒見雨潦則反是吾卜居儋耳城南嘗一至庭下今日又見之進士黎子雲及其弟威家既去吾舉酒祝之曰若為吾來者當再集也已而果然乃為賦詩

粲粲五色羽炎方鳳之徒青黃縞玄服翼衛兩綬朱仁心知閔農常告雨霽符我窮惟四壁破屋無瞻烏惠然

此繁者來集竹與梧鏘鳴如玉佩意欲相嬉娛寂寞兩
黎生食菜真臞儒小圃散春物野桃陳雪膚舉杯得一
笑見此紅鸞雛高情如飛仙未易握粟呼胡為去復來
眷眷豈厲吾迴翔天壤間何必懷此都

鸞

羣書要語鸞者乃神靈之精也雞形五彩名曰鸞鳥見

則天下安寧

山海經

詩句鸞乃鳳之族翱翔紫雲霓

李白鸞鳳本高翔

韓神鸞

垂玉音

陶

古今事實

辨鳳與鸞

辛繕治春秋識緯隱居華陰光武徵不至有大鳥高五尺雞頭燕頤蛇頸魚尾五色備舉而多青棲繕槐樹旬時不去弘農太守以聞詔問百寮咸以為鳳太史令蔡衡對曰凡象鳳者有五多赤色者鳳多青色者鸞多黃色者鵠多紫色者鸞多白色者鵠今此鳥多青乃鸞非

鳳也上善其言三公聞之咸遜位避繕

決錄注

古今文集

雜著

鸞鳥詩

並序

宋范泰

昔劉賓王結置峻卯之山獲一鸞鳥王甚愛之欲其鳴而不能致乃飾以金樊饗以珍羞對之逾戚三年不鳴其夫人曰嘗聞鳥見其類而後鳴何不懸鏡以映也王從其意鸞覩形悲鳴哀響中宵一奮而絕嗟乎茲禽何

情之深昔鍾子破琴于伯牙匠石韜斤于郢人蓋悲妙
賞之不存慨神質于當年耳矧乃一舉而殞其身者哉
悲夫乃為詩曰

神鷺棲高梧爰翔霄漢際軒翼揚輕風清響中天厲外
患難預謀高羅掩逸勢明鏡懸中堂顧影悲同契一激
九霄音響流形已斃

孔雀

翡翠附

羣書要語火離為孔雀

元命包

孔雀蓋分翠旌

楚辭戴修尾之

翹翹若順風而揚麾

詩句屏開金孔雀

杜

我聞大梵王擒跨雞孔雀

荆公

翡翠翡翠赤雀翠青雀也

說文

翠鵲也

爾雅

拾翠羽

洛神賦

詩句荷毛光首飾威蕤爛錦衾

陳子昂

翠羽生南海

同翡翠

翠黃金縷粧成歌舞衣

李白

翡翠鳴衣桁

杜

戶多收翠羽

韓或看翡翠蘭苔上

杜

古今事實

求孔雀

魏文帝遣使於吳求孔雀羣臣以為非禮欲不與孫權

勅付使者

江表傳

孔子家禽

見楊梅門

鷩羽為冠

以下係翡翠

鄭子華之弟子臧出奔宋好聚鷩冠鄭伯使盜誘之殺
于陳蔡之間注聚鷩羽為冠

古今文集

雜著

孔雀生南州

羅州山中多孔雀羣飛有數十為偶雌者尾短無金翠雄者生三年有小尾五年成大尾初春而生三四月後復凋與華萼俱榮衰然自喜其尾而甚妒凡欲山棲必先擇有置尾之地然後止焉南人生捕者候甚雨往擒之尾霑雨重不能高翔又至愛其尾恐人所傷不復奮翔也雖馴養頗久見美婦人好衣裳與童子絲服者必逐而啄之芳時媚景聞管絃笙歌必舒張翅尾眇眇而

舞若有意焉山谷夷民烹而食之味如鵝解百病人食
其肉後飲藥不能愈病其血與其首解大毒南人得其
卵使雞伏之即成其脚稍屈其鳴若曰都護土人取其
尾者持刀於叢篁幽隱之處自蔽伺過急斷其尾若不
即斷回首一顧金翠無復光彩矣

紀聞

古詩

赤霄行

杜甫

嚴武一日欲殺甫及章彝集吏於門武出冠掛于簾

者二左右白其母奔救得免獨殺彘於是有赤霄行
以叙其事

孔雀未知牛有角渴飲寒泉逢觝觸赤霄玄圃須往來
翠尾金花不辭辱江中淘河嚇飛燕銜泥卻落羞華屋
皇孫猶曾蓮勺困衛莊見貶傷其足老翁慎莫恠少年
葛亮貴和書有篇丈夫垂名動萬年記憶細故非高賢

賦孔雀送魏殊

梅聖俞

置從南海桄榔林籠入西州鸚鵡地聳觀翕翼修尾張

鱗鱗團花金縷翠一身燦爛文章多引聲笙竽奈老何
五侯池館不可戀桂樹深枝自有窠鳳凰樓頭饒燕雀
入屋穿簾非爾樂非爾樂去何之北方佳人或歌嘯

題畫孔雀

黃魯直

枕榔暗天蕉葉長終露文章嬰世網故山桂子落秋風
無因雌雄青雲上

律詩

和武相公感韋令公舊池孔雀

白居易

索寞少顏色池邊無主禽難收帶泥翅易結著人心項
毳落殘碧尾花銷暗金放歸飛不得雲海故巢深

孔雀

李郢

越鳥青春好顏色晴軒入戶看沾衣一身金翠畫不得
萬里山川來者稀絲竹慣聽時獨舞樓臺初上欲孤飛
刺桐花謝芳草歇南國同巢應望歸

雜著

係翡翠

翠贊

郭璞

翠雀鷓鴣鳥越在南海羽不供用肉不足宰懷璧其罪賈
害以采

律詩

翠碧鳥

韓偓

天長水遠網羅稀保得重重翠羽衣挾彈小兒多害物
勸君莫近五陵飛

鶴

羣書要語鶴大如鴉長三尺脚青黑高三尺餘赤頰赤

目喙長四寸多純白亦有蒼色者

詩疏

陳標曰鶴與鷓鴣

皆胎化而人以鶴為仙禽蓋鶴難見鷓鴣易見貴耳而

賤目也

唐詩紀事

青田有雙白鶴年年生伏子長便去

永嘉誌

鶴千歲則變蒼又千歲黑所謂玄鶴也

崔豹古今注

鳴鶴在

陰其子和之

易鶴鳴于九皋聲聞于天

小雅

鶴脰雖長斷

之則悲

莊子

白鶴性警至八月露降流于草木上滴滴有

聲則鳴

周處風土記

鶴知夜半注鶴水鳥也夜半水位感其

生氣則益喜鳴

繁露

東方朔為隱語曰尻益高者鶴俯啄

也

漢書

田饒曰夫黃鶴一舉千里集君華池啄君稻梁君

猶貴之以其從來遠也雞有五德君輕之以其從來近

也

韓詩外傳

昂昂然若野鶴之在雞羣

嵇紹

蕙帳空今夜鶴怨

北山移文

黃鶴之一舉兮知山川之紆曲再舉兮知天地之

圜方

駁

詩句仙鶴在人間獨立霜毛整

杜

老鶴萬里心

杜

古今事實

鶴乘軒

衛懿公好鶴鶴有乘軒者及狄人伐衛授甲者皆曰使鶴鶴實有祿位余焉能戰

左

鶴舞市

吳王闔廬有女王伐楚與夫人及女會食蒸魚王嘗半女怨曰王食我殘魚辱我不忍久生乃自殺闔廬痛之葬郡西閭門外乃舞白鶴於吳市令萬民觀之遂使與鶴俱入墓門因塞之以送死

獻鶴道飛

齊王使淳于髡獻鶴于楚出邑門道飛其鶴徒揭空籠以見楚王曰齊王使臣獻鶴過于水上不忍鶴渴出而飲之飛去吾欲絞頸而絕恐人議吾君以鳥故令士自殺吾欲買而代之是不信而欺吾王欲赴他國痛吾兩王使不通故來受罪楚王曰善

史記

華亭鶴唳

陸機以成都王穎勞謙下士謂穎必能康隆晉室遂委

身焉頴以機叅大將軍事宦人孟玖諧機於頴言有異
志頴大怒使孫秀收機機嘆曰華亭鶴唳豈可得聞乎
遂遇害於軍中

雙鶴來弔

見弔
慰門

黃鶴樓仙

荀瓌事母孝妙道術潛棲卻粒嘗東游憇江夏黃鶴樓
上望西南有物飄然降自霄漢俄頃已至乃駕鶴之仙
也鶴止戶側仙者就席羽衣虹裳相與欸對已乃辭去

跨鶴騰空眇然烟滅

述異記

王喬乘鶴

見七夕門

蘓仙乘鶴

蘓仙公者名耽桂陽人有數十白鶴降于門遂昇雲漢而去後有騎白鶴來止郡城東北樓上人或挾彈彈之鶴以爪攫樓板以漆書云城郭是人民非三百甲子一來歸吾是蘓仙君彈我何為

神仙傳

養鶴縱去

僧支道林好鶴時有遺其雙鶴者翅長欲飛林意惜之
乃拔其翮鶴軒翥而不能復起乃舒翼反頸視之有似
懊惋道林曰既有凌雲之志何肯為人耳目翫乎養令
翮成遂放飛去

世說

鶴乃卵生

淵材迂濶好怪嘗畜兩鶴客至誇曰此仙禽也凡禽卵
生此禽胎生語未卒園丁報曰鶴夜生一卵淵材呵曰
敢謗鶴耶未幾鶴展頸伏地復誕一卵淵材嘆曰鶴亦

敗道吾乃為劉禹錫嘉話所誤自今除孔子佛老之語

餘皆勘驗淵材讀相鶴經未熟耳

墨客揮犀

客至縱鶴

林逋隱居孤山常蓄兩鶴縱之則飛入雲霄盤旋久之
復入籠中逋常泛小艇游西湖諸寺有客至逋所居則
一童子出應門延客坐為開籠縱鶴良久逋必掉小船
歸蓋常以鶴飛為驗也

筆談

騎鶴上揚州

有客相從各言所志或願為揚州刺史或願多貲財或願騎鶴上昇其一人曰腰纏十萬貫騎鶴上揚州欲兼

三者

說小

古今文集

雜著

相鶴經

鶴者陽鳥也而游於陰因金氣乘火精以自養金數九火數七故七年小變十六年大變百六十年變止千六

百年形定體尚潔故其色白聲聞天故頭赤食於水故其喙長軒於前故後指短棲於陸故足高而尾凋翔於雲故毛豐而肉疎大喉以吐故修頸以納新故夭壽不可量所以體無青黃二色者木土之氣內養故不表於外是以行必依洲渚止不集林木蓋羽族之宗長仙人之騏驥也鶴之上相瘦頭朱頂露眼黑睛高鼻短喙跬

故解

反 頰

德宅

耳長頸竦身鸞膺鳳翼雀毛龜背鼈腹

軒前垂後高頸麓節洪髀纖指此相之備者也鳴則聞

于天飛則一舉千里鶴二年落子毛易黑點三年產伏
復七年羽翮具復七年飛薄雲漢復七年舞應節復七
年晝夜十二時鳴中律復七年不食生物大毛落茸毛
生乃潔白如雪或純黑泥水不能汙復百六十年雌雄
相視而孕一千六百年飲而不食胎化產鸞鳳同為羣
聖人在位則與鳳凰翔于甸

此文李浮丘伯授王子晉崔文子學道於子晉得
其文藏嵩山石室淮南公采藥得之遂傳于代熙

寧十年正月一日王安石修

舞鶴賦

鮑照

散幽經以驗物偉胎化之仙禽鍾浮曠之藻質抱清迴
之明心指蓬壺而翻翰望崑閬而揚音市日域以迴驚
窮天步而高尋踐神區其既遠積靈祀而方多晴含丹
而星耀頂凝紫而烟華引員吭之纖婉頓修趾之洪嫵
疊霜毛而弄影振玉宇而臨霞朝戲于芝田夕飲乎瑤
池厭江海而游澤掩雲羅而見羈去帝鄉之岑寂歸人

衆之喧卑歲崢嶸而愁暮心惆悵而哀離於是窮陰殺
節急景凋年涼沙振野箕風動天嚴嚴苦霧皎皎悲泉
氷塞長河雪滿羣山既而氛昏夜歇景物澄廓星翻漢
迴曉月將落感寒雞之早晨憐霜鴈之遼漠臨驚風之
蕭條對流光之照灼唳清響於丹墀舞飛容於金閣始
連軒以鳳蹕終宛轉而龍躍躑躅徘徊振迅騰推驚身
蓬集矯翅雪飛離綱別赴合緒相依將興中止若往而
歸颯沓矜顧遷延遲暮逸翮後塵翥先路指會規翔

臨岐矩步態有遺妍貌無停趣奔機逗節角睞分形長
揚緩鶩並翅連聲輕迹淩亂浮影交橫衆變繁姿參差
游密烟交霧凝若無毛質風去雨還不可談悉既散魂
而蕩目迷不知其所之忽星離而雲罷整神容而自持
仰天居之崇絕更惆悵以驚思當是時也燕姬色沮巴
童心恥巾拂兩停九劍雙止雖邯鄲其敢倫豈陽阿之
能擬入衛國而乘軒出吳都而傾市守馴養於千齡結
長悲於萬里

古詩

鶴

白居易

人各有所好物固無常宜誰謂爾能舞不如閒立時

感鶴

白居易

鶴有不羣者飛飛在野田餓不啄腐鼠渴不飲盜泉貞
姿自耿介雜鳥何翩翻同游不同志如此十餘年一興
嗜慾念遂為矰繳牽委質小池內爭食羣雞前不惟懷
稻粱兼亦競腥膻不惟戀主人兼亦狎鳥鳶物心不可

知天性有時遷一飽尚如此况乘大夫軒

和樂天感鶴

元稹

我有所愛鶴毛羽霜雪妍秋宵一滴露聲聞林外天自
隨衛侯去遂入大夫軒雪貌久已隔玉音無復傳吟君
感鶴操不覺心惕然

戲題歐公廳前兩白鶴

劉貢父

明公真愛鶴相鶴選仙骨遂令千里姿為君軒墀物啄
腥豈復辭雞羣鍛翼欲比鳬鷺馴聆音發舞似矜客避

寒孤警將依人

歐公云此禽畏寒每舍屋中

吾聞芝田逸翮不如此

世上悠悠誰識真

續神記遼東城門有華表柱忽有一白鶴集其

上空中言詩遂沖天詩曰

有鳥有鳥丁令威去家千歲今來歸城郭如故人民非
何不學仙豕繫繫

鶴媒歌

陸龜蒙

偶繫江船江樹枝因看射鳥令人悲盤空野鶴忽然下

背翳見媒心不疑媒閒靜立如無事清唳時時入遙吹
徘徊未忍過南塘且應同聲與同類疏翎宛若相逢喜
只怕纔來又驚起窺鱗啄藻乍低昂注定當胸流一矢
媒歡舞躍勢離披似諂功能腰弩兒雲飛水宿各自物
妒侶害羣猶爾為何況人間有名利外頭笑語中猜忌
君不見荒陂野鶴陷良媒同類同聲真可畏

鶴嘆

燕子瞻

園中有鶴馴可呼我欲呼之立坐隅鶴有難色側睨余

豈欲臆對如鵬乎我生如寄良畸孤三尺長脰閣瘦軀
俯啄少許便有餘何至以身為子娛驅之上堂立斯須
投以餅餌視若無戛然長鳴乃下趨難進易退我不如
律詩

和裴相公寄白侍郎求雙鶴 劉禹錫

白首誰為伴朱門幸見呼不知疎野性我愛鳳池無又
云橫上青山勿回顧的應勝在白家時

失鶴

李羣玉

瑤臺烟霧外一去不回心清海蓬萊遠秋風碧落深隨
翎留片雪雅操入孤琴豈是籠中物雲羅莫更尋

步虛詩

劉禹錫

華表千年一鶴歸凝丹為頂雪為衣星星仙語人聽盡
卻向五雲翻翅飛

鶴

歐陽永叔

樊籠毛羽日低摧野水長松眼暫開萬里秋風天外意
日斜閒啄岸邊苔

和樂天送鶴上裴相公詩

劉禹錫

昨日看成送鶴詩
高籠提出白雲司
朱門乍入應迷路
五樹容棲莫揀枝
雙舞庭中花落處
數聲池上月明時
三山碧海不歸去
且向人間呈羽儀

失鶴

李遠

秋風吹卻九皋禽
一片閒雲萬里心
碧落有情應悵望
青天無路可追尋
來時白雪翎猶短
去日丹砂頂漸深
華表柱頭留語後
不知消息到如今

失鶴

韓偓

正憐標格出華亭，況是昂藏入相經。
碧落順風初得志，故巢因雨卻聞腥。
幾時翔集來華表，每日沉吟看畫屏。
為報雞羣虛妒疾，紅塵向上有青冥。

答賈支使寄鶴

薛能

瑞羽奇姿踉蹌形，稱為仙馭過青冥。
何年厚祿曾居衛，幾世前身本姓丁。
幸有遠雲兼遠水，莫臨華表況華亭。
勞君贈我清歌侶，將去田園夜坐聽。

鳶紙鳶

附

羣書要語鳶飛戾天

械撲

前有塵埃則載鳴鳶

禮記

古今事實

鳶墮腐鼠

虞氏者梁富人也登高樓臨大路設樂陳酒擊博其上而游俠相隨行樓下博者射中而笑鳶墮腐鼠而中之游俠相與語曰虞氏富久矣常有輕人之志乃辱我以腐鼠請滅其家夜乃攻虞氏大滅之

鳶墮水中

馬援擊交趾下潦上霧毒氣上蒸仰視鳥鳶跼跼墮水中

放紙鳶

以下係
紙鳶

五代漢李業與隱帝狎昵放紙鳶于宮中

古今文集

古詩

飛鳶操

劉禹錫


鳶飛杳杳青雲裏，鳶鳴蕭蕭風四起。旗尾飄揚勢漸高，
箭頭砮劃聲相似。長空悠悠霽日懸，六翮不動凝非烟。
游鷗翔鴈出其下，慶雲清景相迴旋。忽聞饑鳥噪相聚，
瞥下雲中爭腐鼠。騰音厲吻相喧呼，仰天大嚇疑鷓鴣。
雛畏人避犬，投高處俯啄無聲。猶屢顧青鳥，自愛玉山禾。
仙禽徒貴華亭露，撲檄危巢向暮時。陪鰓飽腹蹲枯枝，
游童挾彈一麾肘，臆碎羽分人不悲。天生衆禽各有類，
威鳳文章在仁義。鷹隼儀形螻蟻心，雖能戾天何足貴。

律詩
係紙
鳶

紙鳶

王逢原

誰作輕鳶壯遠觀似嫌飛鳥未多端
纔乘一線憑風去便有愚兒仰面看
未必青霄因可到偶能終日遂為安
扶搖不起滄溟遠笑殺鵬搏似爾難



古今事文類聚後集卷四十二

欽定四庫全書

子部

古今事文類聚後集卷四十三

詳校官中書臣孫衡

侍讀臣孫球覆勘

總校官編修臣王燕緒

校對官助教臣羅萬選

謄錄監生臣羅善慶

欽定四庫全書

古今事文類聚後集卷四十三

宋 祝穆 撰

羽蟲部

鷹

羣書要語鷹鵠郭璞注鵠當為鷦爾雅一歲為黃鷹二

歲為撫鷹三歲為青鷹廣志仲春之月鷹化為鳩月令仲秋

鳩化為鷹然後設罝羅 季夏鷹乃學習 鷹乃祭鳥

並月令

鷹者其殺之時也鳩者非其殺之時也

大戴禮

紛連

薄以攫竄遂陷首以摧臆

同上

詩句韝上鷹一飽則飛掣

杜

蒼鷹厲爪翼恥與燕雀游

傳元金眸玉爪不凡材

杜

爪拳金鈎嘴屈鐵萬里風雲藏

勁翻兀立槎枒不畏人眼看青冥有餘力

山谷畫角鷹

古今事實

爽鳩司寇

少皞鳥師而鳥名爽鳩氏司寇者也注爽鳩鷹鷂鳥也

故為司寇主盜賊

左傳

尚父鷹揚

維師尚父時惟鷹揚

鷹逐鳥雀

子產始知然明問為政對曰視民如子見不仁者誅之

如鷹鷂之逐鳥雀也

左傳

鷹搏鵬雛

楚文王少時雅好田獵天下快狗名鷹畢聚焉有人獻

一鷹曰非王鷹之儔俄而雲際有一物翱翔飄飄鮮白而不辨其形鷹見於是竦翮而升轟若飛電須臾羽墮如雪血洒如雨良久有一大鳥墮地而死其兩翅廣數十里喙邊有黃衆莫能知時有博物君子曰此大鵬雛也文王乃厚賞之

幽明錄

東門臂鷹

見犬門

鷹飽則颺

魏呂布因陳登求徐州牧不得布怒登喻之曰登見曹

公言待將軍譬如養虎當飽其肉不則噬人公曰不如卿言譬如養鷹饑則為用飽則颺去布乃解

好獵養鷹

元坦為冀州刺史不恤人事專為聚斂性好畋漁無日不出鷹犬常數百頭器網十餘車自云寧三日不食不能一日不獵典畧

失鷹不問

源乾曜京兆尹留守京師仗內白鷹因縱失之詔京兆

督捕獲於野絰榛死吏懼得罪乾曜曰上聖明不以畜
玩真罪遂入自劾帝亦不問

謂帝求鷹

李大亮涼州都督有臺使見名鷹諷大亮獻之密表曰
陛下絕畋獵久矣而使求鷹信陛下意乃乖昔旨如
是擅求是使非其才太宗曰有臣如此朕何憂

呼鷹為樂

姚元崇曰臣年二十居廣成澤以呼鷹逐獸為樂

敵至調鷹

契丹破藥城杜重威等大軍隔絕桑維翰曰事急矣乃見馮玉等計事而謀不合又求見帝帝乃調鷹苑中不暇見維翰退而嘆曰晉不血食矣

維翰傳

古今文集

雜著

鷹賦

魏彥深

惟茲禽之化育實鍾山之所生資金方之猛氣擅火德

之炎精何虞者之多端運橫羅以羈束綴輕絲於雙臉
結長繩於兩足飛不遂於本情食不充於所欲逸翰由
而暫斂雄心為之自局若乃貌非不一相乃多途指重
十字尾貴合廬立如植木望似愁胡嘴同鈎利脚等荆
枯亦有白如散花赤如點血大文若錦細斑似顴眼類
明珠毛猶霜雪身重若金爪剛如鐵或復頂平似削頭
圓如卵臆闊頭長筋麓頸短翅厚羽勁髀寬肉緩求之
事用俱為絕伴或如鶡頭或似鷗首赤睛黃足細骨小

肘懶而易警奸而難誘住不可呼飛不及走若斯之輩
不如勿有若夫疾食速消此則有命鴛頸猴立是為無
病廁門忌大結腹惡軟條不欲絕背不宜喘生於窟者
則好眠巢於木者則常立雙髀長者則起遲六翮短者
則飛急毛衣屢改厥色無常寅生酉就總號為黃二周
作鷄干日成蒼雖曰排廬性殊衆鳥雌則體大雄則形
小遇犬則驚猜得人則馴擾養雛則少病野羅則多巧
察之為易調之實難格必高迴室必華寬薑以取熱酒

以排寒韞須溫煖肉不陳乾近之令狎靜之使安晝不離手夜便火宿微加其毛少減其肉肌肥腸瘦心和性熟令絕雲霄志在馳逐

雙白鷹贊

蕪頤

開元乙卯歲東夷右長白肅賚扶餘而貢白鷹一雙皆皓如練色斑若綵章積雪全映飛花碎點所謂金氣之英瑤光之精高髻偉臆長距秀頸奮發而銳堅剛則厲摩天絕海雷擊颺逝觀其行時令順秋殺指揮應捷顧

盼餘雄當落鵬之賞茂仇鷄之敵實稀代之尤也況此
鳥猛過於衆重倍於凡禮於君則勸忠祭於祖則立敬
壯其體則用武絳其翼則成文彼寵而服之鷄也能果
榮而戴之蟬也能潔矧乎職命司寇師惟尚父聞箴則
姦擇善為更蓋選士之是式匪從禽之足云此謂備於
圖而倣在位也微臣奉制敢稱贊曰

鷹之大者精明竦俊勁而橫絕雄則遠振錦文素綵珠
聯玉潤往乃奮威將軍所徇鷹之次者勇銳光芒絕海

而至乘風載揚絡以紅點文其綵章下韝必中惟吏之良

義鷹記

呂次儒

南公

盱南陸氏世雄於貲子弟矜玩好往往以之易學文售奇訪異以為常它日遇山夫賣猴雛取而畜之甚馴縱其游息門內外毋復羈檢歲久矣猴益老意向類姦然猴壯猴也見婦女必跳梁悚抃如將近之陸氏患焉謀撻之死未施手而猴先驚畏登屋僻去以避禍彈石不

得中人力不能追凡夜寂猴輒潛下取飲食人動則引遁無如之何會少年自虔來臂俊蒼鷹陸氏子弟往從之郊視其搏攝無虛向因就與語薄告以猴害少年許諾為擒之即俱還據高隅發鷹韝已發則逞逞摩空下瞰得猴處猴猶坐不動伺鷹垂近急舉瓦以扞身鷹不能得也奮焉穿雲以逝漸眇默不可見於是主客不知所為方相慰以壺饌未敢議所以謝少年也明日忽聞空中有鈴聲少年色動意其鷹也捨杯噉嚼疾趨昨日

立處仰瞻之果鷹來也方復搏翔下擊猴仍用前計以自全鷹失攫抓揚翮以過後一鷹繼至猴不擬也遂中其擒少年招得所臂鷹而遂擒者委猴而去蓋少年之鷹往招之而來助者也呂南公曰羽毛之居生也縱橫乎林莽之間而順適乎天地之內同而異異而同彼其鷹類非一種聚而已也何少年之所養適當攫抓之不勝而遂能招夫助已者耶夫以通晝夕之奔遯蓋不知其經涉幾千萬里之遠而幾十百之羣隊彼豈有响响

之語言沾沾之勢貌以相諷動者耶至其見助者又未必同棲共育者也而輒相從乎所未如之何之害彼曾人之與耶今人生同州聚同鄉上之人防之以政刑而端良博厚之士尸其教勸其平居束冠衣媚聲色以相翕習有謂之為無志氣行義則起不平之色亦從而恨之惟其一旦撻介患害則人人自若也曰吾愛髮膚又曰吾力不能也埋頭縮手咨嗟而斜睨以浮陽於畏慎之名此一門之內有之矣况嫫族耶嫫族固有此况州

問知識耶是曾二鷹之無知奚志氣行義之得耶嗚呼
人禽之所以異者形名而已矣就形名以索實吾豈敢
知治平之未爾余初出山延陵劉縣尉扶為余道此余
耿嘆焉劉君謂余盍歌之如少陵所詩鵲報蛇余辭以
未能也姑志之亦書其所歎於後矜玩好者可以戒不
如鷹者可以慚及其戒且慚歟劉君與余皆幸矣是夏

六月志

古詩

放鷹

白居易

十月鷹出籠草枯雉兔肥下韝隨指顧百擲無一遺鷹
翅疾如風鷹爪利如錐本為鳥所設今為人所資孰能
使了然有術甚易知取其向背性制在饑飽時不可使
長飽不可使長饑饑則力不足飽則背人飛乘饑縱搏
擊未飽須繫維所以爪翅功而人坐收之聖明馭英雄
其術亦如斯鄙語不可棄吾聞諸獵師

養鷹詞

劉禹錫

養鷹非玩形所資擊鮮力少年昧其理日日哺不息探
雛網黃口旦暮有餘食寧知下韝時翅重飛不得羈縻
上林表狡兔自南北飲啄既已盈安能勞羽翼

王兵馬使二角鷹

杜甫

悲臺蕭颯石龍從衰壑槎枒浩呼洶中有萬里之長江
迴風陷日孤光動角鷹翻倒壯士臂將軍玉帳軒翠氣
二鷹猛腦條徐墜目如愁胡視天地杉雞竹兔不自惜
谿虎野羊俱辟易韝上鋒稜十二翮將軍勇銳與之敵

將軍樹勲起安西崑崙虞泉入馬蹄白羽曾肉三狡狴
敢決豈不與之齊荆南芮公得將軍亦如角鷹下翔雲
惡鳥飛飛啄金屋安得爾輩同其羣驅出六合梟鷺分

籠鷹詞

柳宗元

淒風淅瀝飛嚴霜蒼蒼上擊翻曙光雲披霧列虹蜺斷
霹靂掣電捎平岡砉然勁翮剪荆棘下攫狐兔騰蒼茫
爪毛吻血百鳥逝獨立四顧時激昂

籠鷹詞

張文潛

八月稷黍霜野空蒼鷹羽齊初出籠
劍翎鉤爪目如電利吻新淬龍泉鋒
少年臂爾平郊去草動人呼躍寒兔
竦身下擊霹靂忙毛逐奔風血濡距
爾能搏兔不能食未飽中腸行復擊
主人厭兔爾尚饑一生不悟為人役
蒿間黃雀鳴啾啾饑啄野粟心無求
賦形雖小技能薄不受羈縻卻自由

律詩

放鷹

李白

八月西風高胡鷹白羽毛孤飛一片雪百里見秋毫

畫鷹

杜甫

素練風霜起蒼鷹畫作殊搜身思狡兔側目似愁胡
條鏃光堪擗軒楹勢可呼何當擊凡鳥毛血洒平蕪

架上鷹

崔鉉

魏公鉉元畧之子也為兒時隨父訪韓晉公滉滉指
架上鷹令詠焉滉曰此兒可謂前程萬里也後登第
久居廊廟三擁節旄

天邊心膽案頭身欲擬飛騰未有因萬里碧霄終一去
不知誰是解條人

鷹

章孝標

星眸未放瞥秋毫頻掣金鈴試雪毛會使老拳供口腹
莫辭親手啖腥臊穿雲自怪身如電煞兔誰知吻勝刀
可惜忍饑寒日暮向人啄斷碧絲條

白鷹

劉禹錫

毛羽翮欄白紵裁馬前擎出不輕猜輕拋一點入雲去

喝殺三聲掠地來綠玉嘴啗雞腦破玄金爪擘兔心開
都緣解搦生靈物所以人人道俊哉

詩話

仁人之言

和魯公有觀畫鷹獵兔詩云雖是丹青物沉吟亦可傷
君誇鷹眼疾我憫兔心忙豈動騷人興惟增獵客狂
鮫鮪百餘尺爭及製衣裳范文正公歎曰真仁人之言也

鵲

鵲鵲鵲
並附

羣書要語骨曰鵠瞭曰鵠焦贛易林

鵠鵠負雀注鵠也善捉雀爾雅鵠肩鵠子籠脫鵠也廣雅鵠

彼晨風注今之鵠雅鵠彼飛隼疏隼鵠也齊人謂之題

肩或曰雀鷹春化為布穀此屬數種皆為隼雅

鵠鵠鵠黃頭赤目五色皆備一曰鵠說文王雉一名鵠鵠

江東呼為鵠食魚鵠而有別詩鵠鳥累百不如一鵠鄒陽

書

詩句鵠鵠在秋天杜

古今事實

鵲入鷄羣

上洛王思宗弟思孝以騎射事文宣文宣悅其驍勇謂
曰爾擊賊如鵲入鷄羣宜思好事因改名思好北齊書

罪殺鳩之鷄

以下係鷄

魏公子無忌方食有鳩飛入案下公子使人顧望見一
鷄在屋上飛去公子乃縱鳩令出鷄逐而殺之公子暮
為不食曰鳩避患歸無忌竟為鷄所得吾負之為吾捕

得此鷄者無忌無所愛於是左右宣公子慈聲旁國左右捕得鷄三百餘頭以奉公子欲盡殺恐無辜乃自按劍至其籠上曰誰獲罪無忌者耶一鷄獨低頭不敢仰視乃取殺之盡放其餘名聲布流天下歸焉烈士傳

匿鷄于懷

唐太宗嘗得佳鷄自臂之望見魏徵來匿懷中徵奏事

故久不覺鷄竟死懷中

白居易人箴云玄宗宋璟

射取雙鷗

以下係鷗

後魏秦王幹善弓馬太宗出遊白登之東北幹以騎從
有雙鵬幹以二箭而下雙鵬軍中號射鵬都尉

一發雙鵬

長孫晟與突厥共遊獵嘗有二鵬飛而爭肉因以兩箭
與晟曰請射取之晟乃彎弓馳往遇鵬相攫遂一發而

雙貫焉

隋書
記

古今文集

雜著

鷹鵄圖序

張九齡

鳥之鷙者曰鷹曰鵄鷹也者名揚於尚父義見於詩鵄也者迹隱於古人史闕其載豈昔之多識物亦有遺將今而嘉生材無不出為所呼之變與所記不同者耶然於羽族之中絕有豪傑之表氣感剛悍體侔銛鋒顧視之間偉如也夫授以勁翮意不羣飛資其利嘴義在鮮食生有自然之權用無可抑之勢古之武士法吏齊名比義者以其嚴若郅都飛若李廣委質於所事報功於

所養不憚摧翼以虧勇不立垂枝而屈節是鳥也向之
擬議不亦宜乎夫鸞與鳳將感於仁所不及也雖與鶴
猶較其德彼何有焉况其餘雖飛雖鳴凡者怪者肉非
登俎才非下韝威力不敵羣噪無益然後知二禽之為
角衆鳥之絕倫者也故君子韙其然工人圖其狀以象
武備以彰才美雖未極其天姿而有以見其風骨矣昔
支遁常養名馬自云重其神駿斯圖也非彼人之徒歟

說鵠

柳宗元

有鷩曰鷩者巢于長安薦福浮圖有年矣浮圖之人室
于其下者伺之甚熟為余說之曰冬日之夕是鷩也必
取鳥之盈握者挽而致之以燠其爪掌左右易之旦則
執而上浮圖之跂焉者縱之延其首以望極其所如往
必背而去之焉苟東矣則是日也不東逐西南北亦然
嗚呼孰謂爪吻毛翮之物而不為仁義器耶

古詩

義鷩行

杜甫

陰崖有蒼鷹養子巢柏巔白蛇登其巢吞噬恣朝飡雄
飛遠求食雌者鳴辛酸力強不可制黃口無半存其父
從西歸翻身入長烟斯須領健鶻痛憤寄所宣斗上捩
孤影噉哮來九天修鱗脫遠枝巨顙拆老拳高空得蹭
蹬短草辭蜿蜒折尾能一掉飽腸皆已穿生雖減衆雛
死亦垂千年物情有報復決意遺目前茲實鷲鳥最急
難心茫然功成失所往用舍何其賢近經涵水湄此事
樵夫傳飄蕭覺素髮凜欲衝儒冠人生許與分亦在顧

盼間聊為義鵲行亦激壯士肝

畫鵲行

杜甫

高堂見生鵲颯爽動秋骨初驚無拘牽何得立突兀乃
知畫師妙巧刮造化窟寫此神俊姿充君眼中物烏鵲
滿膠枝軒然恐其出側腦看青霄寧為衆禽沒長翮如
刀劍人衆可超越乾坤空崢嶸粉墨且蕭瑟緬思雲沙
際自有烟霧質吾今意何傷顧步獨紆鬱

呀鵲行

杜甫

病鵲卑飛俗眼醜每夜江邊宿衰柳清秋落月已側身
過鴈歸鴉錯回首緊腦雄姿迷所向踈翮稀衣不可狀
強神迷復皂鵬前俊才早在蒼鷹上風濤颯颯寒山陰
熊羆欲繫龍蛇深念爾此時有一擲失聲濺血非其心

普淨院佛閣上孤鵲

梅聖俞

我新稅居見寺閣金碧照我破屋前日看閣上聚鳩鳩
巢棲飲哺忘窮年雕簷畫壁屎污徧以及像塑頭與肩
寺僧不敢施彈射忽有蒼鵲張毒拳鵲鳴鵲噪鵲鵲叫

怒鵑來此窺腥膻鵑心決裂不畏衆瞥碎一腦驚後先
死鳥墮空未及地反翅下取如風旋獨當屋脊恣撻磔
啄肉披肝腸棄捐老鷗無藝又狼怯盤飛欲近饑目穿
逡巡鵑飽自飛去爭殘不辨烏與鳶羣兒指點路人笑
我方吟憶秋江邊

律詩

鵑

依倚秋風氣象豪似欺燕雀在蓬蒿不知羽翼青冥上

腐鼠相隨勢亦高

鸚鵡

秦吉了附

羣書要語鸚鵡能言鳥

說文

乾羣一名鸚鵡斷舌可使言

語

萬畢術

凡鳥四指三向前一向後此鳥兩指向後行則

以口啄地然後足從之

異物志

鸚鵡能言不離飛鳥

禮記

朱啄之清音變綠衣於素綵

王維白鵲賦

紅腹赤足玄領翠

項

桓玄賦

詩句隴西鸚鵡到江東

劉禹錫

秦吉了出容管廉州大約似鸚鵡腦有黃肉冠

嶺表錄異

古今事實

作賦見忌

後漢禰衡字正平少有才辯而尚氣傲曹操欲見之不
肯操不欲殺之送劉表復侮慢表不能容以江夏太守
黃祖性急故送衡與之祖長子射為章陵太守尤善於
衡射大會賓客人有獻鸚鵡者射舉札於衡前曰願先
生賦之攬筆而作辭彩甚麗後黃祖殺之

不養鸚鵡

漢獻帝時益州蠻夷獻鸚鵡三詔曰往者益州獻鸚鵡
三枚夜食三升麻子今穀價騰貴此鳥無益有損可付
西將軍楊定國令歸本土

本紀

復求鸚鵡父

孫權曾大會有白頭鳥集殿前權曰此何鳥諸葛恪曰
白頭公張昭自以坐中最老疑恪以鳥名戲之因曰恪
欺陛下未嘗聞鳥名白頭公者試使恪復索白頭母曰

鳥名鸚鵡可復求鸚父耶昭不能答

江表傳

鸚鵡報事

張華有白鸚鵡華每出行還輒說僮僕善惡後寂無言
華問其故鳥云見藏甕中何由得知公後在外令喚鸚
鵡鸚鵡曰昨夜夢惡不宜出戶公猶強之至庭為鸚所
搏教其啄鸚脚獲免

呼雪衣女

開元中嶺南獻白鸚鵡養之宮中歲久頗聰慧洞曉言

詞上及貴妃皆呼雪衣女性既馴擾常縱其飲啄飛鳴
然亦不離屏幃間上令以近代詞臣詩篇授之數遍便
可諷誦上每與貴妃及諸王博戲上稍不勝左右呼雪
衣娘必飛入局中鼓舞以亂其行列或啄嬪御及諸王
手使不能爭道忽一日飛上貴妃鏡臺語曰雪衣娘昨
夜夢為鷺鳥所搏將盡於此乎上使貴妃授以多心經
記誦頗精熟日夜不息若懼禍難有所禳者上與貴妃
出於別殿貴妃置雪衣娘於步輦竿上與之同去既至

上命從官校獵於殿下鸚鵡方戲於殿上瞥有鷹搏之而斃上與貴妃嘆息久之遂命瘞於苑中為立冢呼為

鸚鵡冢

明皇雜錄

鸚鵡告賊

長安豪民楊崇義妻劉氏與隣舍兒李弇私通同謀害崇義埋井中劉氏訴於官府縣官詣所居檢校架上鸚鵡忽然曰殺家主者李弇也遂執訊得實明皇封為綠

衣使者

天寶遺事

古今文集

雜著

鸚鵡賦 並序

禰衡

時黃祖大子射

亦

賓客大會有獻鸚鵡者舉酒於衡前

曰禰處士今日無用娛賓切以此鳥自遠而至明慧聰
善羽族之可貴願先生為之賦使四坐咸共榮觀不亦
可乎衡因為賦筆不停綴文不加點其辭曰

惟西域之靈鳥挺自然之奇姿體金精之妙質含火德

之明輝性辯慧而能言兮才聰明以識機故其嬉遊高
峻棲峙幽深飛不妄集翔必擇林紺趾丹嘴綠衣翠衿
采采麗容皎皎好音雖同族於羽毛固殊志而異心配
驚鳳而等美偉靈表之可嘉命虞人於壠坻詔伯益於
流沙跨崑崙而播弋冠雲霓而張羅雖網維之備設終
一目之所加且其容止閒暇守植安停逼之不懼撫之
不驚寧順從以遠害不違忤以喪生故獻全者受賞而
傷肌者被刑爾乃歸窮委命離羣喪侶閑以雕籠剪其

翅羽流飄萬里崎嶇重阻踰岷越障載罹寒暑女辭家
而適人臣出身而事主彼賢哲之逢患猶棲遲以羈旅
矧禽鳥之微物能馴擾以安處眷西路之長懷望故鄉
而延竚將陋體之腥臊亦何勞於鼎俎嗟祿命之衰薄
奚遭時之嶮巖豈言語以階亂將不密以致危痛母子
之永隔哀伉儷之生離匪餘年之足惜慙衆雛之無知
背蠻夷之下國侍君子之光儀懼名實之不副恥才能
之無奇羨西都之沃壤識苦樂之異宜懷代越之攸思

故每言而稱斯若乃少昊司晨蓐收整轡嚴霜初降涼
風蕭瑟長吟遠慕哀鳴感類音聲淒以激揚容貌慘以
憔悴聞之者悲傷見之者隕淚放臣為之屢嘆棄妻為
之歔歔感平生之游處兮若塤篪之相須何今日之兩
絕兮若胡越之異區順攬檻以俯仰窺戶牖以踟躕想
崑山之高嶽思鄧林之扶疎顧六翮之殘毀雖奮迅其
焉如心懷歸而弗果徒怨毒於一隅苟竭心於所事敢
背惠而忘初託輕鄙之微命委陋賤之薄軀期守死以

報德甘盡辭以效愚恃隆恩於既往庶彌久而不渝

孔融薦禰衡以為淑質貞亮英才卓犖志懷霜雪疾惡若讎任座史魚殆無以過若衡等輩不可多得數稱述於曹操操欲見之衡素相輕疾不肯往而數有恣言操懷忿因召之擊鼓裸身辱之融為見操說其狂疾求以自謝操喜勅門者有客便通待之極宴衡乃坐於營門言語悖逆操怒送與劉表衡為融所薦東坡謂融視操特鬼蜮之雄其勢決不兩立非融誅

操則操害融而衡平生唯善融及楊修常稱曰大兒
孔文舉小兒楊德祖融修皆死於操手衡無由得全
漢史言其尚氣剛傲矯時慢物此蓋不知其鄙賤曹
操故陷身危機所謂狂悖者必誦斥其有僭竊之志
耳劉表復不能容以與黃祖觀其所著鸚鵡賦專以
自況一篇之中三致意焉予每三復其文而悲傷之
李太白詩云魏帝營八極蟻觀一欄衡黃祖斗筭人
殺之成惡名吳江賦鸚鵡落筆超羣英鏘鏘振金石

句句欲飛鳴驚鶚啄孤鳳千春傷我情此篇最爲精當也

紅鸚鵡賦序

歐陽永叔

聖俞作紅鸚鵡賦以謂禽鳥之性宜適於山林今茲鸚
徒事言語文章以招累見困樊中曾烏鳶雞雛之不若
也謝公學士復多鸚之才故能去昆夷之賤有金閨玉
堂之安飲泉啄粟自足爲樂作賦以反之夫適物理窮
天真則聖俞之說勝負賢才以取貴於世而能自將所

適皆安不知櫟檻之於山林則謝公之說勝某始得二
賦讀之釋然知世之賢愚出處各有理也

答胡康侯書

謝顯道

承諭進學加功處甚善甚善若欲少立得住做自家物
須著如此邇來學者何足道能言真如鸚鵡也富貴利
達今人少見出脫得者所以全看不得難以好事期待
他非是小事切須勉之透得名利關便是小歇處然須
藉窮理工夫方有入聖域之理

古詩

答聖俞白鸚鵡雜言

歐陽永叔

憶昨滁山之人贈我玉兔子
粵明年春玉兔死日陽晝
出月夜明世言兔子望月生
謂此瑩然而白者譬夫水
之為雪而為冰皆得一陰凝
結之純精常恨處非大荒
窮北極寒之曠野養違其性
天厭齡豈知火維地荒絕
漲海連天沸天熱黃冠黑
距人語言有為玉衣尤皎
潔乃知物生天地中萬殊
難以一理通海中洲島窮
人迹

來市廣州繞八國其間注輦來最稀此鳥何年隨海舶
誰能徧歷海上峰萬怪千奇安可極兔生明月月在天
玉兔不能久人間况爾來從炎瘴地豈識中洲霜雪寒
渴雖有飲饑有啄羈紲終知非爾樂天高海濶終茫茫
嗟爾身微羽毛弱爾能識路知所歸吾欲開籠縱爾飛
俾爾歸託宛陵詩此老詩名聞四夷

鸚鵡詞

蘇郁

莫把金籠閉鸚鵡箇箇分明解人語忽然更向君前語

三十六宮愁幾許

律詩

鸚鵡

杜甫

華屋日漸高
雕檻繫紅綃
故國隴山樹
美人金剪刀
避籠交翠尾
礪嘴靜新毛
不念三緘事
世途皆爾曹

鸚鵡

杜甫

鸚鵡含愁思
聰明憶別離
翠衫渾短盡
紅嘴謾多知
未
有開籠日
空殘宿舊枝
世人憐復損
何用羽毛奇

鸚鵡

白樂天

竟日語還默終宵栖復驚
身囚緣綵翠心苦為分明
暮起歸巢思春多憶侶聲
誰能圻籠破從放快飛鳴

鸚鵡

梅聖俞

一入秦宮去千山隴樹秋
能言依婦女學語類俳優
玉鎖間拘束金籠不自由
哀良是黃鳥死為穆公差

鸚鵡

羅隱

莫恨雕籠翠羽殘江南地
暖隴西寒勸君不用分明語

語得分明出轉難

見鸚鵡戲作

王介甫

雲木何時兩翅翻
玉籠金鎖祇煩冤
直須強作人間語
舉世無人解語言

鸚鵡

白居易

隴西鸚鵡到江東
養得經年嘴漸紅
常恐思歸先剪翅
每因餒食暫開籠
人憐巧語情雖重
鳥憶高飛意不同
應似朱門歌舞妓
深藏牢閉後房中

和樂天鸚鵡

劉禹錫

養來鸚鵡嘴初紅
宜在朱樓繡戶中
頻學喚人緣性慧
偏能識主為情通
斂毛睡目難銷日
彈翅愁時願見風
誰遣聰明好顏色
事須安置入深籠

詩話

鸚鵡傳呼

蔡相確貶新州侍兒名琵琶終焉有鸚鵡甚慧公每扣響板鸚鵡傳呼其名琵琶卒後誤觸響板鸚鵡猶傳呼

不已公悵悵不樂有詩云鸚鵡言猶在琵琶事已非傷
心瘴江水同波不同歸又作送將歸賦未幾公果下世

古詩

係秦
吉了

秦吉了

哀冤
民也

白居易

秦吉了出南中彩色青黑花頭紅耳聰心慧舌端巧鳥
語人言無不通昨日長爪爲今朝大嘴烏爲梢乳燕一
巢覆烏啄母雞雙眼枯雞號墮地燕驚去然後食卵攫
其雛豈無鵑與鸚嗉中肉飽不肯搏亦有鸞鶴羣間立

颺高如不聞秦吉了人言爾是能言鳥豈不見雞燕之
冤苦吾聞鳳凰百鳥王爾竟不為鳳凰之前致一言安
用噪噪間言語

鸚鵡

羣書要語似鵲而有幘

說文

寒皋鵲鵲也斷舌可使言語

淮南萬畢術

鵲鵲不踰濟注不踰濟無妨中國有也

周禮

詩句有鳥名鵲鵲力不能高飛逐走蓬肉味不足登鼎

俎胡為見羈虞羅中

杜冬狩行

古今事實

鵠鵠來巢

魯昭公二十五年有鵠鵠來巢書所無也師已曰異哉

吾聞文武之世童謡有之

師已魯大夫

鵠之鵠之公出辱之

鵠鵠之羽公在外野往饋之馬鵠鵠株株

跳行貌

公在乾

侯徵褰與襦鵠鵠之巢遠哉遙遙稠父喪勞宋父以驕

稠父昭公死故喪勞也

鵠鵠鵠鵠往歌來哭

昭公生出歌也死還

哭也童謡有是今鵠鵠來巢其將及乎

鵠鵠報事

晉司空桓豁在荊有參軍五月五日剪鵠鵠舌教令學語遂無所不名顧參軍善彈琵琶鵠鵠每立聽移時又善能效人語聲司空大會吏佐令悉效四坐語無不絕似有生鵠鼻語難學學之不似因內頭於甕中以效焉遂與鵠者語聲不異主典人於鵠鵠前盜物參軍如廁鵠鵠伺無人密白主典人盜某物將軍銜之而未發後盜牛肉鵠鵠復白參軍曰汝云盜肉應有驗鵠鵠曰以

新荷裹著屏風後檢之果獲痛加治而盜者患之以熱
湯灌殺參軍悲傷累日遂請殺此人以報其怨司空教
曰原殺鴈鵒之痛誠合論殺不可以禽鳥故極之於法
令止五歲刑也

幽明錄

古今文集

古詩

戲詠子舟畫竹間兩鴈鵒

黃魯直

風晴日暖搖雙竹竹間相語兩鴈鵒鴈鵒之肉不可肴

人生不材果為福子舟之筆利如錐千變萬化皆天機
未知筆下鵠鵠語何似夢中蝴蝶舞

白鵠

羣書要語形似雉白花文而尾長

釋文

招白鵠

班固西都賦

林

鵠繡白

王彪之閩中賦

白鵠失素

謝惠連雪賦

古今事實

獻白黑鵠

南越王獻高帝白鵠黑鵠各一隻

西京雜記

古今文集

雜著

白鵬賦

並序

蕭穎士

白鵬羽族之幽奇也素質黑章爪嘴純丹體備冠距頗
類夫雞翟神貌清閒不雜於衆禽棲止遐深與人境罕
接固莫得而馴狎也上聞而徵焉處於雕籠致以驛騎
將集長楊游太液行有日矣天寶丁卯秋予旅東陽適
與茲鳥偕至於會稽之傳舍因感而賦之

鳥之生矣於彼江山彩之玄素文不綺班備文武之玉
飾微妖姬之殊顏遊必海裔棲必雲間冀養拙以自保
祛未萌之憂患不然豈陋彼都邑之佳麗顧投身乎阻
艱以其標自然之靜故名之曰白鵬者歟何天聽之緬
邈辱微禽之瑣細偶一目之見羈委微軀以受制望層
城以斂翼懷衆侶之孤唳從廡置之駿奔仰君門以遐
逝君門兮九重同叫籥兮穹崇池太液兮島方壺萬族
翔泳乎其中晝聒未央之繁弦夕警長樂之靈鐘顧踈

野之賤迹豈敢求一枝而見容越水清兮鏡色吳山遠
兮天逼窺淺深以颺影逗杳冥兮一息謂杉松可得永
日而噪聚萼待足以窮年而啄食一與心賞兮睽違念
歸飛兮何極鸚能言而入座鶴善舞而登軒殊二者之
俗態諒慚惶於主恩是以雖信美而非其志獨屏營而
兢魂者焉

古詩

贈黃山胡公求白鵝

並序

李白

聞黃山胡公有雙白鵬蓋是家雞所伏自小馴狎了無
驚猜以其名呼之皆就掌取食然此鳥耿介尤難畜之
余平生酷好竟莫能致而胡公輒贈於我唯求一詩聞
之欣然適會宿援筆三叫文不加點以贈之

請以雙白璧置君雙白鵬白鵬白如錦白雪恥容顏照
影玉潭裏刷毛琪樹間夜棲寒月靜朝步落花間我願
得此鳥玩之坐碧山胡公能輟贈籠寄野人還

律詩

白鷗

梅聖俞

喬木暗青山晴川下白鷗春雲生嶺上積雪在岩間綠
草張新翳柔冠總翠髮時哉養文素不羨雉班班

白鷗

魏野

山雞形狀鶴精神文似漣漪動白蘋物異恩殊堪愛重
廟堂人寄草堂人

又

李白詩中間未識謝莊賦裏見長思今朝得爾心雖喜

致謝慚無吐鳳詞



古今事文類聚後集卷四十三